

書



2



李都憲先生文集序



中憲大夫都察院右僉都御史致仕東安李公。歷代詩禮之家。三世公卿之後。德原性稟。才由學充。茂著榮名。安享盛福者也。始拜官戶科。

英宗睿皇帝在位。北虜數犯邊。駸



駭內向

帝赫斯怒躬率六師往正其罪而  
腹心之人急於進取忽於機  
宜遂致

大駕臨幸虜庭駐蹕久之中外

皇皇然

皇太后命立

皇太子以係人心

郎王則代理國政公即手疏與  
同官及與諸道監察御史若  
千人追劾其人而擊其羽翼  
已而

行在所傳

命至又群臣百姓合詞以請



王乃即大位。公具扈從死事之  
臣氏名請蔭其子。

景皇帝從之。閔

太上皇帝回鑾。下廷臣議郊迎之  
禮。公請宜從厚。又從之。邊閭  
一罪人上言易

儲。又下廷臣議。公與同官一二

人再三執不可。有以危言動  
公者。公灑泣執議如初。

上皇尋亦知之。方虜衆入寇。畿甸  
擾攘。公念其父少卿公與其  
母太恭人皆在容城。號泣請  
于

朝。冒險訪之。數遇賊不加害。既



見還。即迎就養京城。太恭人  
病瞽。公多方承奉。以寬其懷。  
長兄家。居累於日用。太恭人  
念之甚切。公亟分已俸。與歲  
薪之。立周之。又作書諭諸子  
務順母心。居喪哀毀骨立。而  
祭葬必以禮。人徃徃難之。此

公之大節也。公自給事中。至  
今官四十年間。累陳時政。  
朝廷納焉。與脩宋元史。館閣重  
焉。經理馬政。兵用足焉。巡撫  
邊方。

國門固焉。此又公之能事也。類  
此者多。莫之能悉。其著述有



續崇正辨註晦菴言行錄小學摘易詩圖皆扶綱常正倫理有關世教學者多傳誦之至於歸菴集則平生所作詩文在而惜多散逸所存者僅此耳公子嚴郡太守德恢既編次之秋官正郎德仁復校

正之將刻以傳俾予為之序嗟乎公忠臣也孝子也豈特詩人文士哉是故錄公大節併及其能事序之集首公諱侃字希正號歸菴發身黃甲廕職


清朝其功業在人炳炳琅琅為



一代名臣。可見公先世善慶之積。而公又越歷高壽。歸全故鄉。祭墓出於特恩。謚號起於群議。諸子聯蹤仕路。迄未可量。諸孫奮志科名。來亦未艾。又可見公平生忠孝之報云。

弘治六年癸丑秋九月三日甲午

賜同進士出身資政大夫南京工部尚書致仕淳安胡拱辰序





東安李都憲先生文集卷之一

天又

皇明進士都察院右僉都御史李侃撰

皇明進士嚴州府知府李德恢編次

皇明進士刑部郎中李德仁校正

古體

送大司寇廷璽榮任有序

南京大司寇廷璽張君余親友也少與學同師第  
同年官同朝久之官轍南北不得會者廿餘年茲  
考績來京悅親戚之情話正可樂也今又陞去  
於別也勉成鄙語一首以送之致期勉之意見親  
誼之篤云

扶搖九萬鵬飛去仰視青霄留不住小窓獨坐嘆離群却



憶少年相聚處同在茗溪讀古書夜雨連床數載餘復向  
丹墀同對策聯班玉陛聽傳臚鳳樓映日祥雲起宮柳垂  
絲香拂水同甲同朝經幾年南北睽違逾二紀喜君今復  
上蓬萊狂歌放飲懷抱開相聚幾時復分手離筵酌別傾  
金盃君向金陵我日老歲月雖多相會少莫為情親重別  
離好勸忠貞為衆表感恩思報自當知執法臯陶最可師  
只將忠義酬 明主賡歌重見虞廷詩

送王都憲歸河州省祭

都門拂曙征馬嘶城頭冠蓋紛追隨烏臺有客思鄉切新  
冬却作故園歸知君由來鍾秀氣天生豪傑豈無意周宣  
奮志欲中興故遣申伯來濟世奸孽昔日殲忠良忠良側  
足心惶惶椎殺南山白額虎妖狐鬼域盡逃亡尋逐胡兒

沙漠走北門鎖鑰勞君久邊城既息撫東南東南惠澤歌  
童叟秋餉京儲百萬來重瞳屢頌天顏開  
聖恩寵錫五花誥詔許焚黃展孝懷只今忠孝如君少孝  
在揚名名不小還家莫作故鄉留早向淮揚濟餓殍

送學官之任

廣文先生唐鄭虔才名顯著三十年坐客無擅官獨冷揮  
毫落紙飛雲煙舊曾振鐸歷齊魯教育英才沛時雨文化  
風生百里間澆漓一變迴淳古迓來獻績上金奎奏最超  
陞又冷官朝日團團方退食照見先生首宿盤子淵簞食  
樂不改遷善為仁心無怠古來大用須大才屢見師儒居  
鼎一鼎一朝別我去介休堤柳蟬聲噪早秋河汾事業君當  
振莫為離情嘆遠遊



京華同年會分韻得有字

聖主龍飛復九有中興諸將力赴赴南征叛亂北擊胡旄  
頭星落散群醜一戰功成社稷安封侯金印大如斗馬放  
桃林四海清思賢直與成湯偶大張一網羅英豪岩穴隱  
逸盡收取多士濟濟盈廟堂鳳凰麒麟在郊藪黃門才識  
更超群英風肯落他人後喜逢燈假盛張筵遠致嘉肴速  
諸友車螯炙火味偏長市得金鱗貫之柳小槽滴滴注香  
醪細雨紛紛剪春韭良宵此會盡同年文江學士是龍首  
射策君門才思多縱橫筆陣龍蛇走當年平步上蓬萊蓬  
萊宮中歲月久座上春官位獨尊雍雍揖讓何忠厚試把  
諸君各品題人人盡是調羹手盛筵難再嘆無緣病起強  
歌倚南牖學寫荒詞期勉旃圖取芳名垂不朽

永感堂為梁僉憲作

滕郊咫尺隣鄒魯孔孟遺風化千古生時盡事死盡思季  
路當年游斯土梁君生斯長斯鄉早失怙恃心彷徨春雨  
既濡霜既降惕然有感動悲傷賢父有書不忍讀慈母杯  
捲見即哭門人應廢蓼莪篇養思不逮悲風木高堂已構  
養難追烝嘗屢薦不勝悲因扁斯堂作永感永言誠孝以  
時思

瑞雪歌

冬日田家頻望雪一冬無雪心切切隴頭二麥根已乾兩  
岐大穗焉能結比屋蕭然盡苦饑滿懷愁思空屑屑不眠  
常起看青霄仰見星河還皎潔  
聖主憂民心未安拳拳軫念窮廬寒清夜焚香自祈禱齋



宮深處雙龍蟠精誠感格何神速頃刻雲橫雪滿山灑橋  
吟苦雙眉皺刻溪興盡孤舟還寒氣下侵蟻種滅越犬驚  
號不敢嚙光搖銀海散瓊花凍合玉樓寒凜冽也知神明  
在感通也知造化真奇絕北方宜麥雪宜深不比南閩與  
吳越曉出尋梅渾不見雪共梅花成一片從來三白是禎  
祥絕勝長空落水霰莫笑詞林味太清休誇錦帳烹羔膳  
已知佳瑞動

天顏紫殿浮香闕御宴賜宴歸來笑啜茶酒醒起舞大聲  
歌頌歌天保綿國祚却羨太常才思多况有明卿位師保  
盪梅鼎鼎資調和幾番展卷歆賡和才薄其如瑞雪何

短歌行有序

歲乙亥夏五月因旱禱雨一雨三日余心甚喜既

而麥熟方刈大雨復作余心甚憂遂賦短歌行一  
章用紀其實乃六月初六日也

仲夏連旬天不雨麥未登場禾欲死縣尹率屬索鬼神父  
老蹙額愁田里朝夕懇懇告天公一雨三朝萬人喜長空  
雲掃日初晴草木光華被遐邇黃雲柶畝望無窮金穗盈  
疇更堪美群黎共望獲全收腰鎌刈麥同婦子詎意滂沱  
復大傾日夜連綿竟不止向來喜意變成憂視前憂旱同  
一體歲旱歲滂兮乃民命之所關為喜為憂兮非吾徒之  
私已我願天公促義馭駕烏輪莫把天瓢兮滴滴淋淋傾  
不已

近體

送楊參政守制回有序



成化二年春西北有警并民驚疑

上命侃撫之下車之初適遇濟寧楊君文淵以剛正  
通敏之才佐理藩垣喜得其人以宣

聖化繼而蘭陽丘陵以衰老去濟南王君以碩德重  
望來復得諸公同寅協恭弼成治化并民乂安方  
責楊君以規正忽其母夫人之訃至垂涕告别余  
悼其哀而惜其去愧無春秋之筆以褒其廉正有  
為之才也雖然余居激濁揚清之任奉便宜行事  
之

勅得進退予奪之柄雖無春秋之筆而有春秋之權  
俟其三載秩滿將書其最於

上請旌異寵擢之惜其遇哀而止是可嘆也其行也

因為一律以送詔寓哀輓稱揚之意云

聞計東歸路渺茫擔頭行李是虛囊甘棠茂盛空遺愛萱  
草摧殘倍愴傷塞鴈遠衝霜凜冽嶺猿啼斷月昏黃嗟君  
遊宦多清苦忠孝於心兩不忘

### 送四川程大參

昔日薇垣著令名四川今喜得賢能關河阻隔雖勞勩雨  
露重霜荷寵榮劍閣雲深雙旆遠錦江春暖片帆輕公餘  
倘遇來鴻便無惜佳音寄上京

### 送茗溪周文應

自是茗溪一俊英少年有志到蓬瀛為親不厭居官小守  
已還能似水清地僻罕聞天使過仕優常對古人賡只今  
聖世求賢急佇看飛騰上玉京



送李貢士赴南雍

彤庭對罷赴南京，祖道秋風酒滿傾。  
分手那堪天上別，離歌況是客中情。  
船開遠水孤帆健，棹入長江巨浪平。  
此去成均當努力，他時鴈塔看題名。

送龔少卿廼子

終見寧親到

帝畿綵衣又向故園歸，文能飭治非終困。  
孝足娛情是暫違，富貴莫教誇里閭。  
平安須早達庭闈，行者借得秋風便。  
萬里晴霄一鶚飛。

送天台郭司訓有序

江浦郭惟王積學有年久，困弗遇今年冬。  
被選來京，擢天台司訓，行將有日於別也。  
勉為近體一律。

以華其行云

宋玉才華久擅名，等閑平步上蓬瀛。  
拜官且喜陶英俊，講道還應屬老成。  
驛路去時霜信早，孤舟泊處月華明。  
行行想到天台日，化作春霖泮水清。

送錢生赴秋闈

日暖風和景物明，暮春送客出瀛城。  
柳烟細裊催行色，花雨輕飄濕去旌。  
學究三冬才足用，鵬飛萬里志須成。  
月中丹桂知先折，更聽春雷第一聲。

送友人巡按雲南

與君執手別河梁，驄馬頻嘶去路長。  
鳳闕已霑新雨露，豳冠猶帶舊風霜。  
昆明水濶禽魚樂，金馬山高草木香。  
莫道夷民多梗化，應知南詔詠甘棠。



送平先生致政還鄉有序

沔陽平先生早擢巍科初典教金陵之江浦再教  
浙之餘杭幾三十年諸生化之今年秋致其事以  
歸余不揣庸陋因勉述近體一律以為之贈云

早年折桂上青霄振鐸芹宮育俊髦士類久濡時雨化文  
章應比太山高不思北闕臻華要獨愛東籬醉濁醪吟罷  
看雲坐白石放情山水樂陶陶

送羽人還山

雨過榴花照眼明都門此日送君行入辭北闕  
天顏近端向南宮羽士迎一路看山雲不斷孤舟載月夜  
還行何緣兩腋清風起同到蓬萊幾萬程

送人歸省

久陪仙侶在蓬萊詔許寧親萬里回翠謁椿萱堅晚節花  
搖棠棣占先開一堂和氣春如海數載睽離酒滿盃他日  
推恩應有待龍章璀璨自天來

送人考績復任

三年報政到神州考最歸承  
寵更優已見文章能化俗還期事業竟封侯來時蹊徑花  
初發去日郊原麥正秋境內吏民懸望切長亭柘處莫淹  
留

送人還鄉

文采飄飄一俊英觀光未久趣歸程曾驅雲錦資行陣新  
着官袍沐寵榮別去長亭春正好行過平野雨初晴阿宜  
靈運青霄上頻寄佳音到玉京



贈顧進士有序

進士顧君姑蘇之傑士也茲奉

命西來邂逅旅邸覩其才氣英邁言動有則將來必任清要因賦五言近體一律為贈詩云乎哉以識他日之驗云耳

彤庭對罷日奉使任驅馳旅寓家千里相逢酒一卮聰明過子美瀟灑類羲之還節膺清要從容步玉墀

贈隱者

一生甘澹泊處世更誰如不羨三公貴惟看萬卷書順時聊自適隨處即安居教子膺高薦應知德有餘

贈劉侍御有序

為客數年恒嘆交游之寡合而道義有不同者今

年春喜劉君廷吉巡行是方廉正無私剛明果斷貪吏望風解印而郡邑小民獲安愚甚重之因蹇同寅世昌韻為一詩以贈之詩云乎哉以叙客邊之情耳

奉使西來出玉京半生寥落在山城高堂老母經年別旅館孤燈徹夜清正厭交游忘古意喜逢知己話真情一樽聊慰同為客他日先回早寄聲

贈王都憲二首有序

已丑冬虜居河套數入為寇屢綏苦之亦恐為吾邊患茲寅長王公奉

命總督征討遇於七堡行營喜官軍之來知虜之可破因為一律以贈并詠駐軍七堡一首語極鄙



俚聊以壯軍之志耳

王猛才高冠世英提兵西下寇先驚軍來自覺邊關隘胡  
去應知朔漠清救亂扶危稱郭李隨機應變重良平我衰  
不憚將師旅共滅天驕莫永寧

連珠七堡傍河湟虜寇年年作戰場幾處胡笳吹夜月滿  
川烽火映斜陽謹依仁愿修諸壘從此匈奴避一方自昔  
禦戎惟固守窮兵黷武祗多傷

贈王都憲榮任有序

都憲王公嘗奉

命巡撫淮揚蕪董漕運威信大行奸貪斂跡軍民  
安妥所活饑餓不下百萬且供餽不乏而京師有  
所倚賴遠邇稱頌簡在

帝心以功陞左副都御史仍領前事行將有日於

別也情不能已勉述近體一律以為贈

玉事驅馳已數年烏臺今喜又陞遷九天雨露

君恩重一路風霜使節堅轉粟成功登漢相為霖蘇旱作

高賢京師總望東南餽早塞河湟濟運船

贈同年李方伯迺子

奉使西來觀令儀才華英邁重當時春秋相繼承家學又  
子聯芳到鳳池三晉雲山遊未遍一天風雪去應蓬彩衣  
且向高堂舞嗟我遠親盡日思

贈人奉使占城

征車此日發神京路入交南幾日程銅鼓一聲聞海島旌  
幢萬里過占城中朝禮節應無議外國臣民總見敬為更喜



觀風才獨美歸來有頌獻

皇明

贈入考績遷秩

燁燁才名邁等流紅蓮幕下久淹留三年報政朝  
金闕一旦承恩出鳳州路入瀛洲秋水瀾雲連海岱曉霞  
收明朝相憶知何處月滿寒汀夜泊舟

贈南溪隱者

平生不為利名牽野服飄飄半是仙三迳黃花疑曉露一  
溪綠水帶寒烟灌蔬曉圃泉聲細罷釣秋江月色鮮贏得  
青年無箇事日高常向北窓眠

贈友

不效騷人擁鼻吟窮經惟究聖賢心閑中今古曾懷澗靜

裏工夫歲月深撲戶梅香春有意侵堦草色書生陰休嗟  
老却山林下大旱人方仰傅霖

和梁僉憲韻二首有序

承和鄙韻二首於揚太過愧無德以堪之復依原  
韻勉為二律以贈詩云乎哉聊以遣旅寓之懷耳  
濟濟才華壓俊英巡行到處吏民驚明刑弼教從根化守  
俸為官徹底清虜境烟消邊報息棠陰事簡訟聲平一方  
安堵人歡悅好把穹碑紀治寧

分巡關塞近河湟白草芊芊古戰場化被遠夷清朝漠仁  
施比屋樂春陽奇才已見稱西土清節應知達上方他日  
登仙人共仰閭閻失杜使民傷

和張方伯韻四首有序



先承賜兒輩佳章四首諸兒癡愚不寄一觀迨愚  
至京又不以呈携成至晉陽冬十月靜中言及廣  
中成始讀誦其親情篤厚之意隱然見於言意之  
表雖隔萬里如對目前不覺令人感嘆傷懷有不  
能自己者謹依嚴韻賡和錄奉以寓昔日同游之  
情今日期望之意云

曾向蒼溪共讀書君才高邁足三餘題橋志氣凌司馬正  
誼襟懷似仲舒今日二人俱老矣昔時諸友近何如承  
恩委任安邊事未遂投閑過里閭

書來喜得萬南金寓意秋風最可欽萬里雲山頻入夢一  
家骨肉每關心愁多不覺容顏老別去那堪歲月深旅館  
獨居情更苦

君恩未報緩投簪

黃髮燃鬢尚未生多君友愛及諸甥每因來使封佳味常  
寄音書慰別情百粵漸平知德化

九重委任是廷評暫施惠政安黎庶不日承恩上玉音  
宮柳當年半出芽春烟靄靄近

皇家觀光具闕同陳策賜宴瓊林共插花莫向西風聽杜  
宇且留東廣御驕駟頭將忠義期相勉謾把勤勞對客誇  
和王都憲鳳林秋興回文詩有序

去歲四月承寄鳳林秋興回文詩一律絕妙至七  
月

詔命參贊征西軍務因步嚴韻勉成俚語一律以  
贈希笑覽是幸



鄉西出戰大旗牽膽破賊知我陣堅黃葉樹連雲下月白沙灘映日中天囊傾大計屈多虜性秉真清獨少錢腸斷久思空鬱鬱霜威苦塞遠臨邊

和蘇子瞻題金山寺回文詩

潮初水湧似山傾白浪翻天照月明橋上路通幽徑小寺邊江對獨峯青迢迢遠浦秋烟淡細細飄風晚日晴遙聽望中聲款乃去船飛過亂帆輕

壽陳主事父

七十高年古所稀佳辰正值孟春時香飄綺席和風細酒酌金樽晝漏遲五色鳳雛多盛譽

九重鸞誥在期頤祝君壽考齊松柏諸福駢臻未有涯

壽陳先生廼堂

佳辰正值雪梅天賀客新詩絢錦箋華髮滿頭應上壽絳衣昭代屬名賢恩隨

紫誥來華屋樂奏瑤琴侑綺筵却憶酒闌人散後壽星光照五雲邊

壽陳先生母舅

野服黃冠雪滿顛逍遙林下似神仙積財能散人人悅教子辛勤箇箇賢不羨簪纓隨禁苑喜從龜鶴度華年賓朋歡慶道行樂綠醕稱觴直萬錢

壽人母

喜逢初度值中元綠醕金樽奏管絃南極祥光橫萬丈蟠桃花實並千年才華今見諸孫盛家教曾聞阿母賢日與令郎趨



禁闥無由縮地拜庭前

挽殷尚書父

臯比既撤杏壇空  
壠樹淒涼夕照中  
弟子四方傳正學  
士林千載仰高風  
表刊金石名常在  
官贈銀臺位已崇  
聞說仁人餘慶遠  
篤生明哲効精忠

挽周侍御母

陰雲夜薄婺星躔  
夢斷瑤池竟不還  
教子成名冠有豸  
相夫行義篋無錢  
北堂絲服閑春晝  
南浦雕輿冷暮烟  
聖代只今崇孝理  
龍光行見貴重泉

挽民望父母二首

曾聞高節仰餘光  
幾度令人念不忘  
早歲五湖烟景潤  
晚年三徑菊花香  
官封青瑣方承寵  
夢覺黃梁實可傷  
獨羨

賢郎才更美九原應喜慶流長

坤德生全五福身  
母儀寧讓斷機人  
蚕絲自理成家久  
熊膽親丸賜子頻  
歌薤已成終古恨  
看花無復去年春  
麥黃異日承恩處  
馬鬣封高宿草新

挽丘崇高

同年同選又同科  
相處纒經半載過  
豈料哲人身天絕  
空教僚友淚滂沱  
汜泉臺窈冥難回  
夢萬里淒涼忍聽  
歌最喜諸郎能繼  
武九原憂思慰為  
多

挽程彥實父

香木森森說故家  
羨君行誼更堪誇  
絕聞卧病求方藥  
豈料仙遊遠物華  
烟鎖孤村春日暮  
草荒新塚夕陽斜  
生平種德遺賢嗣  
日近



清光被寵嘉

挽劉母

憶昔乘輅過故鄉，曾隨絲服拜高堂。見來喜得共姜律，別後驚聞孟母亡。花落版輿春寂寞，烏啼宰樹月昏黃。鯀生世托通家好，楚些吟成欲斷腸。

挽金生

當日徐卿夢最奇，送來天上麒麟兒。質疑秋水清無比，才若春雲沛厥施。豈料成人歸幻化，空勞多士重傷悲。可憐埋玉山陽下，淮水東流日夜思。

挽友人三首

一夕文星墮上蒼，交游共嘆哲人亡。傳經高弟從誰講，撫柩孤兒祇自傷。空想雄才誇七步，可憐良史絕三長。不堪

吟罷東回首，落日西風欲斷腸。

李白才高入夜郎，那堪鵬鳥竟升堂。杏壇曉霧沉蒼檜，客路秋風捲白楊。鸞詔未封空悵望，鳳毛有恨重悲傷。遙知旅襯歸埋玉，滿目玄雲慘夕陽。

當年飛步上瀛洲，喜遇明時寵更優。李白才名後昔著，士安勲業至今留。五湖夜靜舟初渡，三徑秋深景正幽。哀計俄傳來

帝里士林惆悵不勝愁。

挽人昆季

玉折蘭摧恨曉風，難兄難弟命何窮。曾聞銓錫名偏盛，深悼機雲志莫通。鴻鴈影沉江海濶，鶴鴿聲斷隰原空。可憐季札傷心切，三匝回旋馬鬣封。



挽詩八首

燕山鍾秀氣君稟自純良好義非由勉  
據才盡所長襟期真磊落事業獨昭彰  
花縣春風在黃堂夜月涼累年民更仰  
千載姓猶香展卷看遺像令人竟不忘

嗟君遺世獨何之零落吟魂竟莫追  
塵滿高堂人去遠月明華表鶴歸遲  
封官昔拜函中誥誅德今看塚上碑  
粉署賢郎情最切臨風惟有淚頻滋

早歲移家入帝鄉閑居獨愛事耕桑  
稠廩內無餘粟教子庭前有義方  
月照虛窓遺舊隱草荒孤塚映斜陽  
賢郎新受褒封

勅追想音容倍慘傷

忽報萱苻謝北堂賢郎天上淚霑裳  
鶯梭織斷秋風冷鸞

鏡臺空夜月涼一命纔膺期就養  
九原遽隔恨何長傷情最是烏啼夜  
返哺聲中幾斷腸

七十年過鬢似霜母儀婦道著鄉邦  
繭絲織紵晨興早熊膽和丸夜坐長  
鸞掩鏡臺春寒寒鶴歸華表月茫茫  
清朝有子承恩重

龍詔褒封賸有光

翩翩文彩播

皇都筆陣縱橫酒醒初官冷一壇書  
萬卷學傳二子慕三蘇詞垣擬待金  
蓮送旅館俄驚玉樹枯惆悵音容無  
復見令人不覺淚盈裾

一生蕭散在五園終日琴書絕世喧  
教子早登名進士受封晚作老黃門  
方期祿養榮三釜豈料哀音動九原  
最是



賢郎腸斷處烏啼清夜月黃昏

平生高義共稱賢聞訃令人倍愴然詩禮從容傷子歿風  
霜振肅喜孫傳月明不返還家鶴雪夜空遺訪戴船落日  
荒山情最切蕭蕭封樹帶寒烟

仲夏書懷

靜裏思千種儒冠總誤身烏能成事業祗是散精神已負  
題橋客終慙獻玉人悠然還自遣聊以養天真

史館述懷

飛甍畫棟碧岩堯曙色微茫始退朝地接蓬萊仙樂近閣  
連霄漢彩雲飄文推班馬英賢集書法春秋世代遙忝列  
詞林深自愧勉將直筆副唐堯

晚過井陘

遠捧

天書策驛騶井陘道險少人家鴉啼古樹陰雲黯蟬響幽  
林落日斜石傍嶢岩非是虎藤垂陡阪曲於蛇成安底事  
渾無計兵敗空教縛左車

山行

險道崎嶇四不平層巒疊嶂苦難行百花過雨叢叢綻萬  
壑因風處處聲人向林泉求隱逸鳥歸岑蔚任飛鳴神京  
回首千餘里心在彤庭侍

聖明

遺遠堂

美哉輪奐是華居遺遠名堂豈自譽金玉滿籬知莫守牙  
籤挿架總成虛廣施濟衆聲還著積善傳家慶有餘堪笑



古今貪吝者子孫貧賤少衣裾

奉親堂

關下承恩賦式微江南喜色動庭闈不圖鼎祿供甘旨且效斑斕戲綵衣遠浦西風香稻熟深溪流水鱖魚肥知君孝養無窮樂一任功名與世違

瑞芝卷

為政寬平總不傷從來和氣致禎祥九莖瑞草臨幽砌三秀竒香滿畫堂縲緲暫拘知詿誤陽春忽布更輝光應知職滿升騰日民詠甘棠永不忘

節婦詩

良人早沒不勝情教誨孤兒盡懇誠有志難踰終死守餘生雖未已亡名瑩然美玉通中白湛若寒潭徹底清有子

只今持憲節賢門旌表沐

恩榮

絕句

登天黨山絕頂

奉使來天黨飄然絕頂遊仰看紅日近俯視碧波流

王府賜宴謝恩

頌

詔西來到潞州賢王眷愛禮何優小臣稽首恭為頌  
國統綿延億萬秋

和姚亞卿同年會詩八首

黃門清夜綺筵開喜見同年次第來一榜人中誰是顯春  
卿今已到三台



一自瓊林共御筵相逢又是幾經年祇今

聖主登賢俊努力同期濟巨川

細讀佳章不憚頻亞卿詩句最清新陽春一曲應難和須  
讓龍頭第一人

宴到更深酒已闌雪消春暖不知寒曲江嘉會真難再自  
恨微軀病未安

同年幾許隔幽冥欲話傷心不忍聽今日相逢須盡醉莫  
教雙鬢漸星星

黃門簪筆侍 鑿坡日近

天顏寵更多獨繼曲江開盛宴熙熙玉燭藹春和

同對丹墀憶往年文星常照五雲邊相期事業追前哲留  
取芳名與世傳

良宵佳會意相投絕勝前人秉燭遊醉後暫隨明月散來  
朝又集鳳池頭



東安李都憲先生文集卷之一

東安李都憲先生文集卷之二

皇明進士都察院右僉都御史李侃撰  
皇明進士嚴州府知府男李德恢編次  
皇明進士刑部郎中男李德仁校正

序

送江浦勞大尹之任序

愛民莫先於重親民之職得賢莫先於重進士之科重親  
民之職民必得其養重進士之科官必得其人聖人養賢  
以及萬民者非是之謂乎

皇上中興圖治重在養民慮民之不得其養也親民之職  
必慎選之慮選之不得其人也又擇進士之賢者以任之  
聖人之心以為圖治重夫親民之職而取賢重夫進士之



科以所重之賢治所重之民必能盡其心而不負 朝廷之所取恤其民而不負朝廷之所使求賢圖治之切即先王旁求俊彥視民如傷之心也何其至哉景泰五年秋多方災異民鮮粒食有勞宸慮既命廷臣舉教職之老成忠厚者百數為州縣長慮不得其人也復擇進士之賢者數十為縣令而江右德化勞君廷器亦在選列除江浦縣令命下之日衆皆怏怏蓋以同列授黃門者日近天顏為繡衣者百僚悚畏何獨見出而俯仰於人耶廷器曰昔子游以聖門之高弟未嘗惜牛刀之割雞濂溪以宋朝之大儒治邑必視民之如傷吾不敢羨廷臣之尊榮而嫌邑宰之卑微但欲效前哲之為邑盡其心以求其報稱庶不負

朝廷重親民之職與賢科之取士矣明道謂一命之士苟存心於愛物於人必有所濟頃以此自期焉余聞其言而嘆曰古之人有大過人者廷器有焉他日之傳循吏其在斯人乎是科之得人亦在斯人乎值江浦諸公徵文以贈因述其間於勞君著書之是為序

送熊驛丞之任序

南昌熊信方直幼以穎敏稱里閭長由有司辟為從事非其志也既而小心謹慎不辭朝夕凡委之以事必盡心盡力先之以公而不循乎已故事無不集而上下譽其賢進之

天官天官以其可用擢為雷港驛驛丞卜日將行其鄉友之在京者來徵言以華其行余惟士之未仕也皆讀書明



理脩其孝弟忠信之行以善其身既出也欲展所蘊盡夫  
仁民愛物之心以行其義士孰不有是心哉苟得崇高之  
位操可致之勢然後足以行其志矣今方直所得者一驛  
丞耳所管者數驛夫耳固不足以展其所蘊而施其及人  
之惠也先正有言一命之士苟存心於愛物於人必有所  
濟方直果能不卑小官脩其職務公以事上仁以待下勞  
而不伐廉而不苛不汲汲於求富不戚戚於處貧清謹之  
名一著而上下之譽自降俾郡邑之貪吏聞之必感動曰  
彼之職卑尚若此我宰寧無厚顏彼之祿薄尚若是我等  
寧不痛心郡縣之吏一能感動而萬室蒙惠濟人之功莫  
大焉所謂一命之士存心愛物於人必有所濟者詎不信  
夫蘇子謂匹夫可以化一鄉况有官守者乎余識方直久

矣知其可與為善故勉之其勿以余言為迂

送蕭思敬還鄉序

廬陵蕭思敬邑之茂族也自幼以質直孝友為里閭所稱  
父早世即知向學日誦數千言必務究其義而止嘗作  
堂以為孝養母氏之所扁曰真壽前國子祭酒安成李先  
生重其孝為之記以進之思敬以家未裕喟然嘆曰冬暖  
而常苦寒年豐而屢苦饑烏能具古言奉滫髓俾吾親得  
以遂夫飽暖安適之樂哉會有輸粟塞下償顆米鹽之令  
思敬請於母氏以忠養之事托其妻子乃走僮刺知精好  
之處而先之大有所獲以此為業僑居臨清徙館陶卜宅  
構室以迎養其母孝養之心於是乎遂比母以壽終四時  
奠享必泫然出涕曰天乎父乎地乎母乎何天地之不恕



而父母之恩背乎嘗誦孟氏之書曰大孝終身慕父母遂因名其堂曰思親請于今泰和少師蕭公為記以志其志弗獲久之請益篤越十有五年而始遂所請非篤於孝而能終身者疇克爾耶思敬今壽登七袞而忽動故鄉之念携妻子戒行有日鴻臚寺序班張君子恕徵余言以為贈余惟思敬自家居至旅次未嘗一日而忘其親生能致其養後能致其思其過人遠矣及其老也不樂土之是安而故鄉之是歸記曰狐死正首丘不忘本也先正有曰不忘故鄉仁也思敬有之其過人益遠矣予既重思敬之賢又重張君之請於是乎言

送石河場鹽課司沈大使序

嘗論官不在於崇卑而貴乎才稱其職也才之稱職則職

雖卑而名日顯才之不稱則官雖高而聲日下故論居官者不必言其職之大小而惟取其才之稱乎任使焉然有才而能稱乎任使是之謂才徒有其才而任使之不稱又焉得為才乎所貴乎才者在於聰明俊偉適時措之宜也

有聰明俊偉之才又能適時措之宜俾之受職而能稱厥官俾之任事而能稱任使斯不負

朝廷任官惟才之意矣苟徒居崇高之位而才之不能充徒抱有為之才而行之不合宜亦不免夫詩人素餐之譏也其於位之崇卑奚足較哉若溪沈士隆以英敏之資由從事迨受官克勤克慎治事精詳自有司以至省部之官罔不稱其才有可用自儒生以至士大夫之輩罔不以其德為可交余與同年張君廷璽每重其為人與之交好深



知士隆之才可用俾之居官必能稱其任使而不曠厥職矣今年夏天官以資格擢為今職於其行也廷璽囑余宜序余惟士隆之才施之於事猶庖丁之揮刃工師之運斤治之皆有其理施之舉得其宜不待用力而事無不理矣矧者海一事奚庸置喙耶雖然職無大小事無巨細舉不可不究心也方今

朝廷邊儲多藉鹽課以為之助然亦豈可忽哉昔孔子必由委吏之會計當然後相魯而齊人化所謂才者未有能勝其大而不能任其小也若龐統非百里之才者殆亦不免後人之譏此官之崇卑所以不足較焉士隆茲往其勉之哉

### 送保定王大尹之任序

保定隸順天畿內之邑也去

京師百里許古百里之內以共官而凡王朝百司庶府文書之具泛用之需皆取給於近者以其易給也

天朝建都於此統御萬方凡百司之所需與夫迎送四夷之所共亦多取給於近邑保定為近邑之一非遠州下邑之比也况其邑土瘠民貧稍暘則易旱稍雨則易澇所旬雖廣而收薄苟得天時雨澤之至而人乃有不齊則亦無可望者邑若是凡治其邑者取惟艱哉必得慈祥愷悌誠於愛民者往治之能致雨暘之不愆而地之燥濕始得其宜不遠農時而人之耕耨得盡其力俾黍稷種稼麥益於民室不可勝用以之共

國用以給百司之所需為易耳非其人則殫民之財貨竭



民之膏脂民之衣食且不給矧能共  
國用以給百司之需哉益都王均璉奉  
命往治是邑告別於所知余同寅劉公慶之屬予為文以  
相其行余惟王均之德之才是邑固不足以勝其任而保  
定之民得王均然後足以遂其飽暖之欲矣夫慈祥愷悌  
皆本於所性仁民之誠不出於勉強聞王均治儀封民皆  
愛戴其去任也民遮道請留非誠於愛民者能如是乎其  
於共

國用以給百司之所需者又何難哉

送南陽任推官之任序

任君名嘉大猷其字也世居山東之陶山幼以穎敏稱里  
閭間至於成童選為邑庠弟子員即能尊師取友晝誦夜

味勤勤惓惓始終不怠正統初余侍家兄教館陶時大猷  
已及卓立於余為畏友迨余領戊午鄉薦越四年為壬戌  
忝進士第承乏

禁近以來學日廢大猷則益其聞見涵而蓄之淬而礪之  
學日積行日脩才日銳暨升太學聞天下之英議知政治  
之得失復試政秋官於讞獄審刑之政已練達矣天官選  
太學生老成練達者八十人出為郡邑試其優劣而第其  
高下量以授職大猷遂膺首選故有南陽推官之擢於行  
也其友人之在京者來徵文以贈之予以友義弗容於辭  
嘗讀禮記有曰刑者例也例者成也一成而不可變者也  
又曰悉其聰明致其忠愛以盡之故古人之治死獄必欲  
求其生謂求其生而不得則死者與我皆無恨也理刑之



官誠能法遺經之言求古入之心何患用刑之不得其中哉理刑之官

朝廷之所重重之者所以重民命也

欽恤之念隱然於設官分職之際故取其慈祥愷悌之賢而不用夫刻深陰險之輩

朝廷於刑官豈輕授也哉大猷茲往益當盡其心焉爾若然庶不負

聖朝之選擢諸友之期望亦不負平昔之所學矣是為序

送張廷器序

余友張廷器早以俊秀選為邑庠弟子員即穎出同輩甫弱冠博聞強識學日富才日銳而同門之士咸以為畏友然而累舉弗利於場屋人咸為廷器惜廷器弗以為意而

益礪其志益淬其學非真志量遠大而不求近功者能如是耶今年春有司掄其才貢之春官試之

大廷而廷器於數百英俊之中若鷲鳥之奮翼健馬之騁足凌霄漢馳康莊莫能攀而倫之者遂膺首選升太學未幾大司成援例請於

朝

命歸依親諸友人之在京者來屬予為序以華其行余惟古之人有去父母之邦適四方萬里故為友者惜其別離可憐之色或為歌為詩為序以壯其行色而寬其懷抱是有不容已者今廷器之歸歸鄉邑耳然吾邑之去京百餘里朝發而夕至焉焉有所謂離別可憐之色而可歌可咏可序者耶是可得而已乎雖然余亦有告焉夫忠告而善



道之亦朋友之義也斯歸也奉親之餘尤當益其見聞以成其初志以為他日遠大之期無心役於外落魄杯酒以荒而業焉不知吾友以為何如

送太平劉貳尹之任序

余友劉公著以太學生歷政地官受山西之太平丞以行告於素所親厚者而戶侯張智與公共相處之善相知之深不意遽別相率餞於都門外或曰劉君其學問通達其才識聰敏其德行謙和其氣質端莊夫通乎學銳於才謹於行而厚其質宜處以京職庶盡其所長外補一邑殊未足展其所蘊也余曰不然臣之忠於君不擇地而施而君子不器當無往而不可也京職則親於君外職則親於民得親於君者必在得民之心而親民之職得民之心者亦

未必不得親於君也所謂親於民者又莫出於州縣之職焉然親民之職非學無以教民非才無以治民非行無以帥民非質無以畏民四者備而後能親民民親則政聲宣著而得親於

君上不難矣以公著之才而外補雖非所宜而其才之展於此乎基也夫今之例京職之著聞者每出補外職外職之有聲者又入補內職豈可拘於內外哉公著之往宜自勉也皆眾曰善遂書以為贈云

送德清劉主簿之任序

景泰壬申秋議者以天下有司多非其人民習於惡而奸宄日興風俗頽弊莫斯為甚請於上命大臣分方考察其吏之不善者黜之或曰欲正其末



者必端其本欲清其流者必澄其源今豺狼當道而問狐  
狸豈能得黜陟之宜耶余曰不然廷臣之於有司固不能  
盡得其人然廷臣近

天類於咫尺其儉邪壞政者易於  
上聞有司遠

君門於萬里其貪酷虐民者無由上達若非公正廷臣出  
而察其賢否以黜陟之則有司豈盡得人天下豈能化於  
善風俗豈能歸於美哉余嘗奉

命出經郡邑觀民之盡力於農畝其長民者必勤於勸課  
民之不務乎農業其長民者必怠於為政凡民俗之朴厚  
澆漓好利飾非貪淫樂貨無非長民者化導之所致也使  
今之考察者果能黜其惡而存其善不惟足以除民之患

而實足以移風易俗不惟足以為見任者之鑑而使後來  
者禁其欲而不敢肆百姓愛之如父母

朝廷目之為循良他日登名於循吏之傳者無不由此舉  
也雖然黜陟既定使所存者不知所以自勉後來者不知  
所以為戒則他日考察之公又有在焉或人唯唯而退適  
余交沈良氏徵文贈其邑簿劉君孟高極言孟高之賢而  
為德清得人賀故因所請書此以為聘言之意云

送江浦林主簿復任序

莆田林均簿佐應天之江浦秩滿三載謁天官考最

上命復其任余同寅錢公廷茂嘗與交善謂余曰自林均  
之治江浦也民物獲惠迨今三稔老弱愛戴去任之日遮  
道以留必其有以感之者焉今還江浦敢求一言以贈余



惟民心之所欲者飽暖所期者豐穰時和歲稔民用康阜然雨暘時若百穀用登雖由於上天其所以動四氣之和致歲時之豐者在於親民之職得其人也夫親民之職民之父母也民之安危所係鄉里小民如嬰兒之依父母有難必赴有寃必訴寒欲衣饑欲食危欲安勞欲逸皆有望於長民之職也為長民者苟或政之不平刑之過中不恤困苦自便身圖使民號呼而轉徙饑渴而頓踣民之怨呼神之罔吊望其年之豐也難矣然必保之如赤子憂之如有傷不虐無告以惠困窮一民饑猶已饑之一民寒猶已寒之所欲與聚所惡勿施民樂於下神忻於上四時和平而豐年可必矣自非誠於治民事神者能之乎若林均者可謂誠於治民事神者歟至若征賦之浩穰期會之峻急

徵訟之糾紛簿書之雜選特有司之末務盡目力以從事而事無不舉矣今

聖主以養民為首務其所刻薦稱賞者不以財賦催科為最而以勞心撫字為賢林均惠民之政要必令俶令終之不易他日

國家勸賞之典當不捨於均矣尚其勗哉

送成縣劉大尹之任序

古人有言仁者必有後余於知成縣劉君公器見之矣君世居保定之容城始游邑庠升太學名重六館正統間擢鹽城令綽有賢聲丁外艱起復除今職卜日將行其邑人之仕於京者來徵言以贈嘗聞公器之先祖士安以耕釣為業重義輕財人有以錢寓士安家未幾兵興道室不復



至即冒鋒燹以往盡以其物歸之河朔之亂連歲不熟遠  
近大饑餓殍滿野取水產烹以食饑者全活甚衆邑丞扈  
文振死無所歸具棺歛擇地塋之取遺金帛悉緘附其婿  
一無所取吾先祖嘉其義嘗作傳美之曰士安生長農畝  
其制行與古人同處甚多使知力學誰能及之今迨其孫  
公器仕於

清朝職應列宿有民社之寄豈非士安積德之驗歟仁者  
有後信然不誣矣然仁者不徒以子孫之多為有後必子  
孫之賢而後謂之有後使若子若孫多而不賢徒足以敗  
業而遺先世之羞何益之有今公器以英邁之才嘗令大  
邑奉法循禮愷悌慈祥不奔鶩貨區以利已不清亂白黑  
以病民故其所至綽有聲實其為賢子孫可知矣予觀世

之為良有司者以逢迎催科為能事以奉法循禮為迂遠  
徒疲精役形鈞聲餌利徼一時之倖而不顧民之顛危者  
多矣若公器者誠可謂絕無而僅有者也茲行也亦惟移  
治鹽城者以治成將見德愈懋而名愈揚庶勿忝於爾祖  
矣他日治績之成躋華列要可跂而待姑書此以贈

送馮用和守制還鄉序

昔孔子稱子賤曰魯無君子者斯焉斯余以為人之知  
夫禮者亦必由父兄師友之賢以化成之使無賢父兄師  
友而能知夫禮者鮮矣馮姓良其名用和其字者茗溪習  
禮之家也其伯父遵道仕永樂間嘗贊政烏臺綽有聲譽  
自御史大夫以下莫不竒其才而稱其直時左都御史劉  
公威權隆赫中外嚴憚其子福驕橫御史以下咸以大哥



李東新亦  
知劉觀必禍  
故能自免

呼之而導道未嘗屈於禮嘗直呼其名而戒之曰爾翁之  
官必由爾敗若不循理禍將至矣福深憾之導道知其不  
免尋謝病歸未幾而劉公之禍作一時僚屬多遇其害而  
導道安於田里從容自如非知幾明理君子能若是耶時  
家君亦仕栢府導道加重稱為李先生嘗謂人曰李先生  
本分至誠必昌厥後他日免於禍者其斯人歟及劉公事  
敗出其門者皆不能免獨家君以清白稱今致政家居年  
踰八旬而康強至侃兄弟忝登仕途非導道賢而知人又  
能若是耶矧茗溪之間若陳三山之道德陳南金之誠實  
而用和之所以知夫禮也宜矣况其才俊過人練達政務  
他日之顯顯政績之卓異詎可量哉今年待選天官聞計  
丁外艱歸斯歸也必能以平日所聞於父兄師友之禮以

盡人子之大事而使遐邇之人知茗溪俗化之可尚不亦  
美乎夫禮之大者莫大於送終用和勉之若然不惟父兄  
師友之賢足以成用和之德而用和之孝又足以成父兄  
師友之志也茲因陸仲春等言用和知禮之士徵文以贈  
遂書其所見聞者以塞其請云

送洛陽縣丞趙容謹序

江浦趙容謹由太學生初授河南偃師縣丞有惠政及民  
民愛之如父母未幾以外艱去民思之不能忘茲以服闋  
起復貳政於河南之洛陽將行其友地官主事韓公某等  
來徵文以華其行以余與容謹有姻婭之好弗容於辭惟  
貳令親民之職也洛陽中州之地也職美而地善容謹得  
不喜於中乎嘗觀銓曹注官揭榜



內廷選人雲集引領爭覩於斯時也孰不欲其職之美而地之近且善也閱訖而各知其職與地之美惡故或喜而或怒或笑而或泣其故何也蓋以職之惡者不能以善始而善終地之惡者不能以自養而養民是不免有喜怒矣泣之異亦人情之常耳何足恠哉靜而思之為銓曹者將若何而遂其欲乎蓋必有其道矣然不在其位而不謀其政未暇以論者也然而容謹是除有民社可為之柄徃之洛陽居中州可為之地得以善始而善終足以自養而養民也審矣要必以平昔所抱負者見之於設施而勿吝民之所欲與之聚之民之所惡則無施焉將見澤之及於民者皆惠政民之不能忘者皆實情政豈有不善民豈有不

得其所者哉苟徒以其地位之美而自便焉是不欲行其所學矣又何望澤之及於民乎容謹可不思所以盡其心乎

送廣州府推官沈伯淳序

宣德癸丑余嘗遊學苕溪僅三載始北歸又七年来京竊取一第叨職近侍於今二十餘載矣於曩時歲脩將息登高臨流之處自不能已於懷思一時相與交游之朋欲得一會以伸其契濶而詢其出處則升沉淪謝所存者十無四五焉然而得會聚於此者十無二三焉而沈君伯淳亦當時相與交遊者升南京太學有年矣去秋来京始得一見以盡其歡無幾擢為前職

命下卜日將行諸友人之在京者咸惜其別屬余言以贈之余惟交游之情恒念其不相會得會矣而又惜其別於



別也寧無一言以塞諸侯之責乎夫士之仕也莫不以愛人為心然其有罪焉憫而宥之不任法以刑其過此郡守縣令之所為也非司理之官司理之官知有法而已其用刑也貴乎輕重不爽是非允當自非察之明而斷之公鮮能勝其任矣伯淳勉之他日聲譽之著揚芳邁烈友道中寧不有光乎

送德清醫學訓科沈宗玉序

宗玉茗溪之世醫也代不乏人縣侯以醫官久缺薦宗玉來京授醫學訓科行將有日邑人之仕於京者來徵文以贈惟郡邑之屬有儒學陰陽醫學各設官以教其生徒而其官皆以訓名皆欲訓其徒俾精其業以正民俗以資民用以救民命而缺一之不可也曰訓導者訓之以六經而

導之以德禮也帥其徒以與其教俾郡邑之內家詩書而戶德樂其風俗豈有不厚乎曰訓術者訓其徒俾精天文地理之術足以使民信時日敬鬼神畏法令決嫌疑以定猶與其資民用也豈小補哉然儒與陰陽固足以正民俗資民用矣醫之所繫尤有關於民之命焉曰訓科者訓其徒俾精內外大小之科故郡邑之內諸扶而來者舉而求者皆得以起死回生而無夭折之患矣噫民生日用於陰陽之術可或無而改無也儒之道猶救粟之與水火不可一日而去焉民去瘴氣水火而死猶棄中華仁義之俗而習夷狄禽獸之行雖生而不如死也醫家活人之功與吾儒正民之性同一轍故古人云不為良相則為良醫以美濟人之功同也余之才德不足以兼良相醫又不獲兼



於宗王之行不能無其為是為序

送河東運司經

利者天下之共趨也心之所同欲也得之則喜失之則憂  
人情莫不然何也夫口之於味有同嗜焉耳目之於聲有同  
嗜焉目之於色有同美焉是口與耳目之欲人皆有之也  
然其欲也必有漸也後足以充其耳目之欲人皆有之也  
而後足以操其目是數者非財無以致之財非求無以得  
之從古以來廉潔少而污濁多者率由此耳能寡欲而不  
趨於利者幾何人哉山東范均由太學生擢河東運司經  
歷于茲三載報政來京粟無旣石囊素蕭然可謂貧乏不  
能共者矣或曰論天下之利莫大於鹽矣論鹽筴之利莫

勝於河東河東之鹽天下巨地南風一播鹽即結成人皆  
坐食以資天力非若海水山木之利煎熬出素其煉成醜  
必資人力而後得焉掌鹽筴者苟因其自然之利而少取  
之則何求不得何欲不遂哉非特足以充其已之口與耳  
目之欲至於子孫親族亦得以遂其欲矣非特子孫親族  
遂其所欲至於賓客之奉與夫所識貧乏者又得遂其所  
欲而感其恩惠矣何乃自苦若是哉愚曰不然利之所產  
固有其地而取與不取則在乎人古人有身處膏脂不能  
自潤而徒辛苦者是能以寡欲養性而所存者大也所存  
者大豈計其利之得與不得欲之遂與不遂哉若范均處  
貨利之場而貧不能共可謂寡欲者矣茲以考最還任某  
人等徵文以華其行因表其能自守者以為贈云



送羅以文先生序

嘗讀韓子師說有曰弟子不必不如師師不必賢於弟子聞道有先後術業有專攻意此言則師與道為二矣昔孔子為師道不離乎日用行事於鄉黨恂恂在宗廟便便或申申天天或蹴踏與與弟子審視詳記是則是效是孔子之明道本諸身弟子之求道在於師是師與道為一焉若師不必賢於弟子動容周旋未能中禮道何在耶雖然韓子專以傳道受業解惑而言能傳道受業解惑而道亦明能明其道亦能行其道矣至於記問以為師呻吟其佔畢者惟能誦古語而於道未知也道雖未知而尚能誦古人語何況教弟子誦時文以謀利祿哉其於道又何在耶河南羅以文先生先分教廣平人材輩出教有成績滿九載

陞今職余雖未獲接先生之言論觀先生之容儀而與先生高弟馬公明文為僚友同僚咸稱馬公為直諒觀馬公之行則先生之德可想見矣昔胡安定之為師弟子化之循循雅飭遇之皆知為胡公弟子先生有焉茲往也必能移廣平之教以教蒲城則師道立而善人多亦能如廣平之盛矣於行也馬公徵文以送辭弗獲因書以贈

送武昌紀檢府之任序

紀姓宣名文昭其字吾邑之火族也其伯父永樂間嘗為山右方伯剛毅果斷出乎人表至今人咸稱之父讀書好禮慝不出仕文昭幼以穎敏過人性剛而直心坦而善為人所重後補邑庠生德業有成升胄監歷事棘寺德益脩學益博理無不通事無不知人皆期公之臨民則民



必懷其惠矣公不樂於事而竊謂之曰臨民之職非苟然也苟得其人則民受其福非其人則民受其殃吾之才固不及而於有司之重亦非所望倘得見用於時必思所以報稱而不負先人之望公之言可謂謙尊而光者也今年

春

朝廷


命下天官擢公為湖廣武昌府檢校得以遂其素志而稱厥心矣鄉人之在京者徵余言以賀余惟一郡之中守以董其事佐以分其理檢府不過叅駁文案之儉邪寃察六房之得失其職任清高進退從容誠所謂優游自得者矣矧文昭庶靜端謹寬厚和平其於叅駁之得其當寃察之盡其詳則已既正而罔敢不正矣將見吏書不敢肆其奸

邪文案不得容其差失則有益於郡豈小補哉豈待任臨民而後有於治也他日九載績成則不次之擢可馴至矣何以授職之崇卑而較之耶故曰不患無位患所以立乎其勉之予日望之是以為序



馬

馬



馬

馬



金剛